

Dr. M: Bila Rancangan
Malaysia Ketiga dilancar

Lebih banyak peluang untuk Bumiputra berniaga

U.M. 18 JUNI 1976

TIMBALAN Perdana Menteri Dr. Mahathir Mohamad berkata, peluang-peluang untuk Bumiputra memasuki bidang perniagaan dan perusahaan lebih banyak terdapat dalam Rancangan Malaysia Ketiga yang akan dilancarkan bulan depan.

"Mereka yang mempunyai kemahiran yang cukup di bidang teknik akan lebih mudah mendapat pekerjaan di bidang itu di samping itu mereka yang tahu menjalankan perusahaan pertanian secara moden akan dapat menambah hasil dan pendapatan dengan lebih tinggi dari perusahaan mereka", katanya.

Timbalan Perdana Menteri, menyatakan untuk mengujudkan sebuah masyarakat yang lebih adil dan bersatu padu, pelajaran dan latihan mempunyai peranan yang utama dan penting.

Beliau berucap merasmikan bangunan tambahan Sekolah Kebangsaan Rungkup dekat sini yang berharga \$240,000 mengandungi lapan bilik darjah, pejabat, bilik guru besar, bilik guru, kantin, tempat basikal, jalan tili, pagar, air paip dan api listrik.

Beliau menambah: "Jika kita ingin melihat lebih ramai Bumiputra mengambil bahagian dan berjaya di bidang perniagaan dan perusahaan mereka perlu terlebih dahulu melengkapi diri dengan ilmu pengetahuan di bidang-bidang tersebut."

Katanya: "Dalam keadaan negara sedang membangun kita bergantung kepada kemajuan di bidang sains dan teknologi dan juga ilmu pengetahuan di bidang perniagaan serta perdagangan."

BAGAN DATOH 17 JUN

Menurutnya, kementerian sedang mengusahakan supaya lebih ramai murid-murid Bumiputra dari kawasan luar bandar menerima pelajaran di bidang-bidang ini.

Katanya, kerajaan sedang melaksanakan Dasar Ekonomi Baru yang bertujuan untuk membasmi kemiskinan dan menyusun semula masyarakat.

Ladang

Katanya: "Bila Dasar Ekonomi Baru ini berjaya mencapai matlamatnya kita akan dapat melihat sebuah masyarakat yang lebih adil dan bersatu padu dalam mana pendapat rakyat akan mencapai tingkatan yang lebih tinggi dan kemudahan hidup dinikmati secara lebih sama rata oleh seluruh rakyat."

"Pada masa itu, kita akan dapat melihat orang-orang Melayu tidak lagi hanya dikenali sebagai kaum tani, orang China peniaga dan pedagang dan orang India sebagai pekerja di ladang-ladang besar dan sebagainya."

Ketiga-tiga bangsa ini, menurutnya, akan hidup bersama-sama mengambil bahagian dalam semua bidang perusahaan dan hidup

bersama-sama di tengah masyarakat dengan penuh persefahaman, muhibah dan kerjasama di bawah lindungan perlembagaan dan bendera Malaysia yang sama-sama kita julang tinggi.

Menurutnya, dalam Rancangan Malaysia Ketiga, Kementerian Pelajaran memerlukan peruntukan dua kali ganda lebih besar dari peruntukan Rancangan Malaysia Kedua untuk projek-projek pembangunannya supaya lebih banyak kemudahan diberi kepada sekolah-sekolah yang memerlukannya terutamanya dari kawasan kurang maju.

Ini menunjukkan kerajaan amat berazam untuk meninggikan mutu pelajaran di negara ini dan memberi lebih banyak peluang belajar kepada kanak-kanak yang memerlukan pelajaran.

Dengan kemajuan di bidang pelajaran kita dapat menyediakan tenaga mahir dan ahli profesional seperti guru-guru, jurutera-jurutera, akauntan-akauntan, doktor-doktor dan beberapa profesion lagi.

"Ini akan dapat menentukkan Rancangan Malaysia Ketiga dan berikutnya mencapai matlamatnya dengan kadar seperti yang ditetapkan" katanya.